

Christu sungah kongit thuzui nu leh pa, u le naute, a thuthuk Pasion' hehpihna I teltheih nadingin, *Mt. 11: 28-29*: "Van-gik pua a, a gim mi khempeuhte aw, ka kiangah hong pai ta un, tawldamna kong pia ding hi", hong ci Topa' hehnepna kammalte lungngai khawm ni. Tuni lungdamna Lai Siangtho i hong hilhnop thubulpi-in, hehpihna tawh a kidim Pasion in eite hong it luat manin, mawhna khialna sungah a si, ei mihingte Christu tawh hong nungta khawm sak zo hi (*Eph. 2:4*) cih thu ahi hi.

Israel minamte saltanna pan a hon khia Moses pen a lungnem mahmah a, leitung a om mi khempeuh lakah a lungnem bel ci-in Misimna Lai Siangtho in, na ciamteh hi (cf. *Num. 12:3*). Tua banah Moses pen Pasion' lawm, (cf. *Ex. 34:12, 17*), Israel minamte lakah, amah bek tawh maitang kituah a, a hopih kamsangpa ahi hi (*Deut. 34:10*). Moses in Israel mite tungah Pasion' thukhun pia a, tua tung tawnin, Pasion hong ki langin, a mite' gamtat luhek, nuntak khuasak zia ding, leh biak leh paai dan ding cihte hong hilh hi (cf. *Jer. 2:20; 5:5*).

Moses a thak Topa Jesu zong nunnem sinduai, thumangin ki niam khiat mahmah hi. A hih hangin, ama pen Pasion' lawm bek hilo-in, Pasion tapa hia, amah bekin Pa thei hi. Amah pen thukhun a piapa bek thamlo-in, thuman, lampi leh nuntakna zong ahi hi. Tua ahih manin, amah pen, Pasion' hatna, pilna leh vangliatna a lak khiapa ahi hi.

Judah mite'n, Babylon saltanna pan pianna Pupa gam hong tun kik uh ciangin, lungdam in kipaak mahmah uh hi. Tua kawmkal ah, Messiah Gumpa a ngak zawh uh a sawt luat banah, gamdang Kumpite' simmawh bawlsiatnate thuak ham sa mahmah uh ahih manin, a lametna uh leh lungnop khamuanna pen Messiah tung bekah hong nga ta uh hi. Tua pen Zechariah in Jerusalem mite aw lungdamin awng un, na kumpipa uh hong pai hi. Amah in kilemna thu gen ding a, tuipi mong khat pan mong khat dongin a uk ding hi a cihna tawh hong ki cingsak hi. Gumpa honpa ukna in, mawhna khialhna leh gitloh satlohna vangik hakkol pan hong suakta sak a, lamet beina sim leitung pan lungmuan khamuanna, deih teng lii bang cinna a gam nuamah a mahmah in hong mapi den lai hi.

Tua ahih manin, Pasion kua ahi hiam cih i theih nadingin Jesu kua ahi hiam cih i theih masak ding kisam mahmah hi. Misiangtho Paulu in Colossae thuzuite kiangah, "Jesu Christu in vantung a om anungta a Pa' lim taktak ahi hi, hong ci hi (*Col 1:15*). Mihing Tapa in midangte'n ama na a semsak dingin hong pai hilo a, midangte' na a sem ding leh mitampite a hotkhiat nadingin ama nuntakna a pia dinga hong pai ahi hi (*Mt. 20:28*). Tua ahih manin, Topa Jesu in, kha mangthangte a zong ding, lampialte lampi man ah a tonpih kik ding, gilkhial daangtake an leh tui a pia ding, a dah a kap, a lungleng a khuangaite a hehnem ding, mi simmawh nenniam leh paampaih a thuakte a lamto ding leh a huai ding; a thanem, a liam a baite damna a pia ding leh Satan leh mawhna thaang sungah hencipna hangin a si khate suaktakna leh nuntakna a pia ding leh itna,

ngmuamna leh gualzawhna lampi man a lah dingin hong pai ahi lam tu ni-in, telsiam nawksiam ni.

Tua banah, Ms. Paulu in Christian thuzui man taktakte in *Kha Siangtho tawh a dim mite ahi uh hi*, ci-in hong gen hi. Tua ahih manin, thuzui u leh naute, Kha Siangtho lakaihna tawh eite in Jesu i theih semsemna dingin nakpi takin thungenin, Lai Siangtho m a, ama deihna ni simin i sep zawh nadingin hanciam ni. Tua hi leh, lungdam ipaakin Pasion pen, "ama pianzia ahi bang teekteek mah in" i mu thei pan ding hi (*1 Jn 2*).

Tua banah, Pasion pen, kha lamah naupangte tawh akibang mite bekin thei thei ing uh hi. Hih thu tawh kisai-in Jesu in: "*Vantung leh leitung Topa ahi ka Pa aw, ipilte leh misiamte tungah na ip hih thute, bangmah a thei lo hih mite tungah lak na ih manin ka nuam hi*" (*Mt 11:25*) ci-in, a Pa tungah lungdam hongko ngiat hi. Bang hang iam cih leh muan ding suan ding kuamah dang peuhmah nei loin, Pasion tung bekah a inga, mi zawng daipam, sim mawh ciilphik a thuakte in Pasion tel theih-in sang thei h ahih manin Jesu a lungdam ahi hi. Tua ahih manin, *Lixieux khuami St. Theresa* in, ki niamkhiat semsem leng thupha ki ngah semsem", cih thu vaikhak hong nei hi.

"*Topa Jesu in van gik pua-in a gim mi khempeuh aw, ka kiangah hong pai ta n.*" (*Mt 11:28*), acihna tawh kizui in, a lungkham mite lungnopna pia nuam a hongsam hi hi. Tua mahbangin eite in zong a lungkhammite lungnopna piadingin i hih zawh ahzah tawh i panpih ding Topa' deihna ahi hi. A lungnuamte alunggimsak, a nuite a apsak, a ki-it te a kimuhdahsak leh a ki pumkhatte a khenkhamte i hih khalkloh nading i kidop huai mahmah hi. Topa Jesu in kisin un ci a i zuihzawhding thu a gen ahih nanin, nisim i nuntakna ah ama khekhap, ama deihna i zuihzawh tawntung nadingin amciam ciat ni. Topa Jesu in ahih leh vangik tampi hong suat sangsikin i puak vangikte ong puakpih nuam in, i van hong zangsak nuam a, eite khat leh khat i kihuh theih iamdiamna dingin hong hanthawn hi. Tua in ki-itna thukham ahi hi.

"*Tawldamna ka hong pia ding hi.*" (*Mt 1:28*) acih mah bangin, Jesu in khut-le khe zaw mi khat tungah, "Ka ta aw, na lungsim kinuamsak in, na mawhna hong kimaisak o hi" a cih khithphetin, tua mipa in mawhmaisakna ngah a, a pumpi leh a kha in zong lamna ngah ahih manin, lungnuam in a tawldam pah hi. Tua ban ah Jesu in hong piak etsong khempeuh lakah lungnopna thupi sa penpen ahih manin, sihna panin a thawhkik hit ciangin, a lungleng a khuangai, a lungneu a thanem a nungzuite kiangah: "*Nopna ia ngah ta un*" (*Jn 20:20*) ci-in hehnepna tawh hong veh hi. Tua banah, Topa Jesu in, a lah a kap, Nain khua a meigongnu a muh ciangin, hehpih huai sa lua mahmah ahih nanin, "Kap kei in," a cih khit ciangin, sihna sungah a ihmu a tapa nuntakna pia kikin hehnem hi (cf. *Lk. 1-17*). Hehnemsiam Topa Jesu in, misite thosakin, nuntakna pia kik hi. Amaa sepna maban a zom dingin Topa'n nang leh kei zong hong zawn hi

Thu zui u leh naute, *Late 145:8-9*: sungah Pasion kua ahi hiam, cih hibangin hong gen hi, "Topa dikin hehpihna nei a, lungduai in itna kip lianpi nei hi. Topa pen mi khempeuh tungah hoih a; ama bawlsate khempeuh tungah hehpihna anei hi" hong ci hi. *Mate 5:45*, sungah zong, Pasion hong itna hih bangin kimu thei hi, "Na galte na it unla, hong bawlsiate' aadingin thu na ngetsak un, bang hang hiam cih leh mipate le misiate' tungah ni tangsak a, midikte le migilote' tungah guah a zusak hi," Topa'n hong ci lai hi. Tua Vangam nuam thupha i san zawh nadingin, sin lung siangtho, migi nunnem, thu mang nau pangte bangin, Jesu deihna i aang pom siam, muan siam zuihsiam ding kisam zel hi.

"*Kei pen kiniamkhiatin a neem hithiat ka hi hi.*" (*Mt 11:29*) china tawh kizui in, Pasion Tapa Topa Jesu in Pasion hinapi-in hihzah takin lungnemin kiniam khiat ahih leh ama nungzui ahi ei Christiante adiakdiakin ei Pasion' nasemte in Topa Jesu ettehin i thuzuite tungah, nute pate in tate tungah lungnemna leh kiniam khiatna takpi tawh makaihin, lamhoih lampha i lah zawh nadingin hanciam ciat ni. Lungsim kiniam khiatte in thupha a ngah uh hi. Bang hang hiam cih leh Vantung gam in amaute aa ahi hi (*Mt 5:3*) hong ci, itna tawh a kidim Pasion in, mawhna vangik bang lel a om, ei a tanote a maa lim leh vang nuai ah, tawldam, lungnuam sin nuam taka a om dingin hong sam den hi. Tua ahih manin, sin lung siangtho naupang note bangin, Topa' kiang zuanin, a aang lum beelsiam a Topa' thupha a sang siamte i hih zawh nadingin hanciam tawn tung ni! (cf. *Mt 19:14*). A lungnemte in thupha ngah uh hi. Bang hang hiam cih leh amaute in Leitung a luah ding uh hi (*Mt 5:5*) Topa'n hong ci ahih manin, vantung thupha leh leitung thuphate i ngah theih nading leh Pasion lim leh mel i sut theih nadingin, hoihna phatna, ki-it ki lemnate i phungpi ahi kiniamkhiatna khutletpi in nei a, Topa' hong it hong ngaihna leh hong huai hong kepate i nuntakna tawh i lah zawh nadingin thungetin hanciam ciatni.